

涂騎省集



徐騎省集卷第十三

東海徐



宣州涇縣文宣王廟記

復三茅禁山記

宣州開元觀重造中三門記

紫極宮新建司命真君殿記

楞嚴院新作經堂記 攝山棲霞寺新路記

常州義興縣重建長橋記

宣州涇縣文宣王廟記

徐集卷十三

一

昔夫子祖述堯舜憲章文武扶東周於已絕拯蒼生於
既墜其迹屈而道愈大其人亡而教愈遠則生民已來
未之有也其在祀典法施於人則祀之矧褒聖之祀其
可忽乎然則中人不足以語上下士聞道而大笑故斯
教也衰於戰國廢於嬴政漢魏以降續而復絕夫仲尼
日月重昏千祀非聖人孰能廓之故斯教也興於武德
盛於貞觀極於開元理自然也兵興以來大化墮替先
王禮器委頓於勝廣之門闕里諸生悽惶於絳灌之下
矧厥祠宇其存幾何天之愛人不當遂絕皇統再造六
藝始修太歲丙午重熙在運宣城雄鎮帝之叔父在焉
故幕府之選殊重尙書郎吳君光輔奉詔佐廉部兼理

於涇旣蒞事乃被儒服謁先師闢荆棘厯堦垣以造於
茅茨之間仰瞻俯觀喟然而歎於是奉開元之成制采
頽宮之舊章經之營之是卜是築惟新祕殿儼飾粹容
入室升堂森然如在籩豆有位賓主由序表著咸列門
衛肅然於是青衿雩服之子有從師觀藝之場鯁齒鮐
背之徒識養老慈幼之節欣欣然其化之大者歟明年
秋君奏計如京師因得其實嗚呼聖人在上羣才畢舉
使三代之風得達於邑里不其偉哉余承君之歡美君
之志刊石紀事實於祠庭後之君子無忘企及其餘理
畝籍察庶獄闢汙萊遏陂塘則有考功之吏在故不書

徐集卷十三

二

於時太歲丁未冬十月九日尙書主客員外郎知制誥
徐鉉記

復三茅禁山記

華陽洞天金陵福地羣仙之所都會景福之所興作故
其壇館之盛薦享之殷修奉之嚴樵牧之禁冠於天下
其所由來舊矣聖厯中微官失其守望拜之地多所荒
蕪若乃眞靈翔集玄貺胼蠶興復之迹必假異人天祐
丁丑歲貞素先生王君棲霞始來此山恭佩上法徘徊
地肺偃息朱陽永懷舊規期在必復先生潛德內映符
彩外融名士通人道契冥會凡縞紵之贈脆信之資悉

奉山門以成夙志於是良常洞至雷平山十里而近於入萌隸者盡全贖之芻蕘不得輒至墟墓不得雜處藝樹蔽野植松爲門川梁必通榛穢必翦建方壇於雷平之上造高亭於良常之前朝修有致誠之地游居有稅駕之所姜巴古陌秦望舊封肅然清光復如開元天寶之歲矣先是紫陽之右有靈寶院焉真臺故基鞠爲茂草先生殫罄資用克今上殿堂有開必先無遠弗屆都督武陵康王奉錢百萬梁王造殿一區向道之徒咸助厥事會未周歲惟新舊宮皆先生之力也昔大隗致襄城之駕庚桑化畏壘之人是知道心惟微其應如響時

徐集卷十三

三

則有若道士經若虛協規同志是攝是贊幹事以恪感物以誠績用不愆斯實攸賴先生以保大壬子歲夏四月悉書夫屋之數疆畔所經請命於京師申禁於郡縣以授茅山都監鄧君棲一能事旣畢數日而化期命玄應昧者不知夫仙階感召諒非一揆若乃神清氣靈骨籙標映受之於天也心虛器冲玄德充蔚基之於性也昭真垂教啟煥靈迹行之於勤也故策名紫素飛步黃庭流功儲慶必參相合然則先生之道其殆庶乎雖歛駕不留冥升日遠而高風可述遺範在人進而紀之翰墨之職也鄧君企慕前躅見託直書己未歲秋八月記

宣州開元觀重建中三門記

夫清淨玄默道之基也宮館壇墀道之階也生知者因
基以成全勤行者升階而覩奧故君子德業玄挺仁慈
積中必廣馴致之方乃形兼愛之迹爲科誠以檢其情
性爲象設以致其誠明情性平則和氣來誠明通則靈
符集由是登正眞之境入希夷之域曠矣無際薰然太
和斯實興化致理之方還淳返朴之本豈與夫延方士
尙祕祝求長生以自奉者同年而語哉宣州開元觀遠
擬清虛獨標形勝敬峰崇峻鎮其後句谿澄澈經其陽
鍾一方淳粹之精結三素氤氳之氣當秦陵之尊道揭

徐集卷十三

四

聖厓於華題藹爾殊庭居爲福地及運纏百六數偶三
災雖棟宇不渝而制度多闕靈蹤必復有待而興主上
嗣位之七年皇室再造之一紀今儲后徇臧札之操讓
德承華體間平之賢總戎藩服首台司而握師律鎮京
口而領宣城其爲政也質于先正諮於耆老義以果斷
仁以發生民力不偷闕政咸舉而斯觀路門久廢遺址
將蕪非所以敬教尊祖會昌建福者也乃命執事卽從
經度民多暇日府有羨財勤而不勞成而勿亟巨棟山
立層簷翼舒六扉洞開方軌並入重廊助其迴合祕殿
表其深嚴十絕之幡拂文楣而絢彩九龍之驂軋金鋪

而振響瞻之者有凌雲之氣經之者疑駕歛之游信足以勵上士之進修福蒼生於仁壽旣而功宣納麓望集撫軍大壯之制斯成重離之位亦正貞符允塞盛德宜書道士孫洞虛素業淳深至誠敦慤發揚真迹啟迪嘉猷永爲不朽之功願紀他山之石宮臣執筆以謹歲時戊午秋九月庚申記

紫極宮新建司命真君殿記

夫金闕琳房不可階而升也惟至誠能通之靈符景福不可企而望也惟至行能致之故君子行道於時宣力於國敷惠於民貽範於家此人之極致自天所祐也又

徐集卷十三

五

況考集靈之地崇列真之宇薦納約之信勵勤行之誠然則希夷眇邈超言象之表矣有若故司空相國馮翊懿公承世功之緒襲重侯之業地親於副馬美繼於緇衣便蕃臺閣夷險中立不倚金石貫其心唯力是視風霜盡其節故四綜會府再踐中樞三殿方鎮一平邦土慎終如始沒有遺忠激楚之樂雖窮通德之門不改嗣子太僕少卿俊等祇奉慈訓弗敢失墜以爲公之純誠冲氣本道家者流而仁政令典近浹於三茅之境高齋甲第夙鄰乎玄元之宮故棲神植福必先於是爾其冶城峻址西州舊署十忠貞之遺隴郭文舉之故臺九原

可作勝氣如在乃相形勢補廢闕建司命真君之殿於宮之良維披真蘊以立程集國工而考藝瞻星揆日不勞而成崇高壯麗重深藻繪煥如也凝旒端簡負辰仍几穆如也珠幡絳節紛披乎左右空歌洞章蕭寥乎晨暮真聖以之而臨御純嘏以之而蕃錫賢人啟後孝子奉先無以加於此矣鉉始以事分通舊從子弟之游終以禁掖具員陪僚屬之末及公之啟手足也復忝國士之許辱寄託之任知己之厚何日而忘短篇敘事益感遇之萬一也

楞嚴院新作經堂記

徐集卷十三

六

君子才足以治劇惠足以安民見危致命以死勤事有一於此然後可以薦信於無方之神儲慶於必大之門噫楞嚴院經堂之作也其庶幾乎平陽柴君諱進思字昌美故太尉中書令尋陽靖王之孫也少而爽俊長而忠恪尤善騎射頗曉兵書靖王愛之出則典親兵居則專家政幹蠱之美宗族稱之王薨始爲公臣累遷旅帥鴻圖再造金革寢威上以其才能可任故以爲內宴副使乘輅建節將命四方盤根錯節所至皆治改鄂岳觀察巡官知永興縣事縣有山澤之征權管之利歲終考績倍於前人遷泰州軍事判官兼營田鹽監平蠹政決

庶獄勞農督課潔己律人民不告疲公有餘利除勸農使復監池吉二郡護武昌軍千里晏安上流靜謐會梁人入寇我武未揚東畿陷沒羣情震駭命君爲行營應援軍使率舟師數千鼓行而東平難濟口復海陵郡於是淮泗之地聲勢始通乘勝長驅因逼隋苑前茅接戰羣帥後期振臂奮身有死無二雖破竹之勢敗於垂成而東道清夷本由君之一舉也江都剋復歸葬京師天子憫焉贈左千牛衛將軍賻贈加等禮也嗣子殿前承旨廷遇等棘心在疚荼蓼兼倍以爲苴麻苦由飾哀之期有終蒸嘗封樹追遠之禮有數復欲圖不朽之績徼

徐集卷十三

七

無邊之福則金仙之教世之所崇宗旨在於經文威容存乎像設於是擇奇勝之地補闕遺之事全上經堂六間塑地藏菩薩像一軀几席什器之類華而備精而固耽然其質煥乎其章深嚴足以遠世喧虛明足以味玄旨其全節之風也如彼其集靈之所也如此然則冥冥之祐縣縣之慶豈誣也哉余頃歲左官海陵君盡傾蓋之分感忠臣之事主嘉孝子之奉親刻石紀事以聳善也援筆悽愴無心於文保大丁巳歲春三月日東海徐鉉

記

棲霞寺山水勝絕景象瓌奇明徵君故宅在焉江令公
舊碑詳矣高宗大帝刊聖藻於貞石紆宸翰於璿題煥
乎天光被此幽谷先是茲山之距都也五十里而遙方
軌並驅崇朝可至及中原全亂多壘在郊野無牧馬之
童岐有亡羊之僕義祖武皇帝潛龍茲邑訪道來游始
命有司是作新路金椎既隱玉馱言還桐山之駕不追
回中之道亦廢於戲聖人遺迹必將不泯微禹之歎夫
何逮哉保大辛亥歲時安歲豐政簡民暇粵有寺僧道
嚴名高白足動思利人百姓莊思悚家擅素封積而能
散嗟亭候之不復憫行旅之多艱乃相與翦荆榛疏坎

徐集卷十三

八

窳闢通衢之夷直棄邪徑之迂迴建高亭於道周跨重
橋於川上鑿甘井以救暵立名表以指迷草樹風煙依
然四望峰巒臺榭肅肅前瞻由是江乘之塗復識王畿
之制矣余職事多暇屢游此山喜直道之攸遵嘉二叟
之不懈爲文刻石用紀成功俾後之好事者以時開通
隨壞完葺此碣有泐斯文未湮不亦美乎其年八月一
日兵部員外郎知制誥徐鉉記

常州義興縣重建長橋記

聖人作川梁以濟不通舟車所及纒連棋布若乃形勝
傑大名聞天下者亦無幾何陽羨長橋其一也夫英賢

之所躔次邑居之所瞻望山川之精粹宅焉里城之神靈憑焉廢而興之圯而葺之豈惟備政足以徼福是橋也徵諸圖牒則後漢邑令袁君創造國朝永泰中令丘君新之其他無聞焉中興之初邑有義夫曰吳濛吳湏率以私帑備加營今上人賴其利踰三十載丙辰歲國步中梗百越寇邊邑人敗之燒營而遁飛燄旁及宏梁半摧甲寅歲著作佐郎劉君來爲邑長視其制度知非民力之所能濟乃狀其事白於有司上聞嘉之詔賜錢八十萬君信而好古寬而得眾尉盧禧鼎甲餘慶俊造策名政是以和事無不舉乃相與敷王澤因民心備物致

徐集卷十三

九

用程功揆日器利工善材良事時戊辰歲冬而栽明年暮春而畢長五十步廣七步對縣樓而直出跨荆谿而橫絕丹雘其飾宛偃蹇而虹舒崇高其勢邈蒼亭而山立朱輪方軌駟馬連騎營營市井憧憧往來有衽席之安無揭厲之患昔者乘車濟涉聖人謂之無教橋梁弗修賢相知其不能以今方古勝負分矣夫書云考績傳載稱伐庸庸善善其可廢乎刻之貞珉以示來者庚午歲春二月十五日記

徐騎省集卷第十四

記二

東海徐 鉉

重修徐孺亭記

喬公亭記

毗陵郡公南原亭記

劍池頌

九疊松贊

硯銘

野老行歌圖贊

四皓畫贊

許真人井銘

高侍郎畫象贊

文獻太子哀冊文

齊王贈太弟哀冊文

重修徐孺亭記

徐集卷十四

一

至矣哉天之愛民甚矣雖數有治亂而常生聖賢故得其位則功加于時舛其運則教垂于後雖銷聲滅迹全身遠害不德而德普逃名而名揚擁篲築宮禮重于列國式閭表墓道光於無窮舉善而教政之大者也恭惟我祖炳靈南國舊宅界乎仙館高臺峙乎澄陂孺亭之稱海內瞻仰名公良牧代加崇飾千載之下猶旦暮焉頃屬邦君非才敗我王度翦焉層全上鞠爲茂草噫百世之祀誰能廢之庚申歲始建王都辛酉歲遂迂清蹕肆覲羣后疇咨先賢餘基未傾偉人將至旣而鼎湖在御桐圭錫壤丞相司空鄧王以茂親之重膺分陝之權思老成之典刑仰高山之景行罔言而信不肅而嚴乃命

經營將從締全上九成方起百堵未周甲子歲入秉國鈞

以武昌連帥侍中濟南公代司宮籥公致用以武從政
以文祇奉蕭規率由周禮再廢成制詳考舊基夷坎窞
而就平裨崖岍而增固乃崇堂奧乃加藻績右巖罅
之序左設庖膳之區前臨康莊旁眺城闕平湖千畝疑
碧於其下西山萬疊倒影於其中依然懸榻之場想見
致芻之狀與夫洪崖之館絢綵於煙霞滕王之閣騫飛
于雉堞南州之物象備矣前哲之光靈萃焉嗟乎君子
興一役建一事于時必可頌于後必可觀茲亭之作也
都人朋悅過竇矚目紀于方國之史播于樂職之詩鉉

徐集卷十四

二

也幸承燕翼之謀獲參翰墨之任俾垂不朽敢憚蕪音

喬公亭記

同安城北有雙谿禪院焉皖水經其南求塘出其左前
瞻城邑則萬井纏連却眺平陸則三峰積翠朱橋偃蹇
倒影於清流巨木輪囷交陰於別島其地豐潤故植之
者茂遂其氣清粹故宅之者英秀聞諸耆耄喬公之舊
居也雖年世屢遷而風流不泯故有方外之士爰今上經
行之室回廊重宇眈若深嚴水瀕最勝猶鞠茂草甲寅
歲前吏部郎中鍾君某字某左官茲郡來游此谿顧瞻
徘徊有懷創造審曲面勢經之營之院生僧自新聿應

善言允符夙契卽日而裁逾月而畢不奢不陋旣幽旣
閑馮軒俯盼盡濠梁之樂開牖長矚忘漢陰之機川原
之景象咸歸卉木之光華一變每冠蓋萃止壺觴畢陳
吟嘯發其和琴棊助其適郡人瞻望飄若神仙署曰喬
公之亭志古也噫士君子達則兼濟天下窮則獨善其
身未若進退以道小大必理行有餘力與人同樂之爲
懿也是郡也有汝南周公以爲守有潁川鍾君以爲佐
故人多暇豫歲比順成旁郡行再雩之禮而我盛選勝
之會鄰境興闐戶之歎而我賦考室之詩播之毗頌其
無愧乎余向自禁掖再從放逐故人胥會山水窮游良

徐集卷十四

三

辰美景賞心樂事有一於此宜其識之立石刊文以示
來者于時歲次乙卯保大十三年三月日東海徐鉉記

毗陵郡公南原亭館記

人生而靜性之適也若乃廟堂之貴軒冕之盛君子所
以勞心濟物屈己存教功成事遂復歸于靜用能周旋
於道常久而不已者也有唐再造俗厚政和人多暇豫
物亦茂遂名園勝槩隱隣相望至于東田之館西州之
墅婁湖張侯之宅東山謝公之游青谿賦詩之曲白楊
飲酒之路風流人物高視昔賢京城坤隅爰有別館百
畝之地芳華一新舊相毗陵公習靜之所也其地却據

峻嶺俯瞰長江北彌臨滄之觀南撫新林之成足以窮
幽極覽忘形放懷于是建高望之亭肆游目之觀睨飛
鳥於雲外認歸帆於天末四山隱見而屏列重城邈迤
而霞舒紛徒步而右回闢精廬于中嶺倚層崖而築室
就積石以爲階土事不文木工不斲虛牖夕映密戶冬
燠素屏塵尾榷几黎牀談玄之侶此焉游息設射堂于
其左湛方塘于其下虛楹顯敞清風爽氣襲其間倚岸
縈迴紅葉翠苔藻其浚至于芳草嘉禾修竹茂林紛敷
翳蔚不可殫記凡廐庫之室厨廩之區賓燕所資不戒
而具每良辰美景欣然命駕羣從子弟結駟相追角巾

徐集卷十四

四

藜杖優游笑詠觀之者不知其爲公相也古人有言朝
廷之士入而不能出況於輕鐘鼎之貴徇山林之心將
相之權不能累其眞肺腑之親不能系其遁道風素範
豈不美歟又以鉉無事事之情有善善之志見徵拙筆
用勒貞珉是時歲次辛酉冬十月日記

劍池頌

并序

歲次辛酉月躔仲冬王人徐鉉揚旌銅柱之鄉稅駕劍
池之廟慨嘆靈迹徘徊故墟或曰龍泉太阿安得爲寶
出也不爲當世之用佩之不免亡身之災天下固有虛
名而無實效者歟愚以爲不然夫聖人之於天下亦物

耳所稟受者異故能與造物者並而爲天下王是以聖人之作也天不愛其道地不愛其實同聲相應同氣相求人謀鬼謀皆爲聖人用無功無迹豈尋常所能識乎然則集陰陽之英萃山澤之精窮爐冶之妙極鋒鋌之利宜其冥合玄造弼成聖功者也昔黃帝法月滿而鑄鏡用能照燭怪魅辟除不祥大禹收貢金以鑄鼎使民知神姦以遠不若漢高祖佩斬蛇之劍以撥亂除害奄有天下是以三者皆人力所爲也咸能輔佐興運與時隱見其可誣乎在昔三分叔世咸有昏德天命將改寰宇將同斯劍知之故靈發于下氣浮于上應帝王之符

徐集卷十四

五

命矚識者之觀瞻亦猶伊尹負鼎於莘墟仲尼動色于魯相千載一會聖賢所以汲汲也向使晉武能誕若天意克明峻德判忠邪之路絀驕侈之心則賢能盡其才神靈效其用消耀之烈可續七百之期不爽而王猷旣鬱亂本旣成百姓失望羣龍沮色於是斯劍也委質張雷之鑑一泄其憤遠迹劉石之醜復歸于潛其出也所以示神之不亡其去也所以示唯德是輔則其爲用也遠矣昔者周過其數秦不及期是知天命之精微可以人事而延促前哲論之備矣若夫精眞之誠修于內感召之致應乎外自然而然有道存焉不可以智求不可

以言達王者得之則三五之功其餘事耳然則天下至寶本非人臣所服變化無方神物之事也忘身殉國忠臣之節也兩造其極求仁得仁復何怨乎廟在豐城故縣俯瞰池岸壯武侯雷府君之象祀焉去今縣四十里而龍泉太阿之廟別在中路棟宇綿久皆將傾頽邑人朱暉等洽重熙之化感百世之祀獎率同志唯壽宮千載光靈煥然如在縣令孟賓于尉孫舉皆以文行之懿中賢良之選接武連事惠此王畿推誠於民荐信於神風雨不愆耕鑿咸若先賢遺躅其不泯也宜哉是池廣不終畝深才數尺父老云近歲旦暮往往有雲霧蒙覆其中恍惚之理不可測已今中興三葉聖政惟新豈非靈命孔昭玄貺將集天命不僭弘之在人使臣司言敢告有位乃爲頌曰

徐集卷十四

六

周室旣衰仁獸來臻晉祚不融龍劔効珍神化無方天命無親德之不建與運俱淪歸潛厚載以俟真人惟劍之神惟賢之識湛湛靈沼綿綿廟食瑞氣常在玄符靡測垂茲頌聲永永無極

九疊松贊

并序

同安郡南二十里古城南隅有松焉拳曲擁腫勢若九疊交柯聳幹無不蟠屈者其地高迥旁無壅闕莫知其

何由如是或曰下有頑石根不得舒氣脉債興故爲此
狀好事者以爲盛觀焉余始聞其名今至其下睹之而
眙曰嗟夫草木麗地稟天之和條暢秀茂固常也若乃
原隰之宜失陰陽之候違柔脆之姿則離披枯瘁貞勁
之質則鬱抑盤錯生理乖矣獨有瓌奇之貌嗚呼失其
所乎昔在太古君臣強名賢愚同城洪洪洞洞是謂大
和降及後代聖人有作顯仁義建功名扶衰拯弊不得
已也於是愛惡則象生焉其甚者飾行以矯時執方
以違俗考槃閭巷聲重王公上德喪矣獨有高世之譽
嗚呼荀孟屈賈之徒豈斯松之類耶感物徘徊因爲之
贊吁嗟彼松孰爲而生天枉其性屈折其形人實我貴
我非所營噫嘻淳風曷歸大道安行吾欲與汝各全其
眞作此好歌以告騷人

硯銘

他山之石是斲是治荆藍表瑩雲露含滋執簡而至磨
鈇在茲言出乎身文以行之噫嘻君子慎爾樞機

野老行歌圖贊

昔在陶唐光宅萬國下或知有帝將何力鼓腹擊壤嬉
游無極自然而然忘適之適中古道薄親仁懷德末世
政亂姦宄寇賊淳風不還可以嘆息丹青志古存諸往

則嗟爾有位鑑茲王式

四皓畫贊

君子道行必資其位邈哉四賢隱居救世皤皤之貌丹青假志爾無素餐觀此知媿

許真人井銘

長史含道棲神九天人非邑改丹井存焉射茲谷鮒列彼寒泉分甘玉液流潤芝田我來自西尋真紫陽若愛召樹如升魯堂敬刊翠琰求識銀牀噫嗟後學揖此餘光

高侍郎畫象贊

徐集卷十四

八

穆穆清真不緇不磷文高學富道直誠純昭質已邈斯猷愈新丹青畫象以永光塵棠陰峴首瞻仰霑巾

文獻太子哀冊文

維顯德六年太歲己未九月癸卯朔四日丙午文獻太子薨于東宮延春殿以某年十有二月壬申朔十三日甲申遷座于文園禮也象輅差階龍樓向曙肅仗衛以將引儼罇疊而不御主上感深守器念極寶天痛玉符之靡召悲銀榜之空懸詔下臣於信史載盛烈于瑤編其詞曰

於昭我唐誕受帝祉舊邦維新令問不已亦有積慶載

生賢嗣平王之孫吾君之子越在綺紈芳若蘭蓀綠車
表慶寶玉疏恩東平錫壤南昌啟藩耆老諮訪工墳討
論文以行禮時然後言敬愛表於天性信厚由於自然
運屬重熙地惟明兩古尚達節吾先德讓剖符分陝居
東作相封燕禮縟副戎業廣績著保釐道高寅亮敬亭
南屏浙水東馳是惟關輔以衛京師乃移節鉞建此藩
維擇其令典導以由儀仁薰俗厚化洽風隨國步中艱
文身怙亂鎮以高臥制之長算取彼鯨鯢戮爲京觀吳
門載同輿詞協從天之眷命我豈矜功乃正皇統斯維
至公爰撫軍而監國亦納揆而登庸業彌盛而學彌廣

徐集卷十四

九

望益高而禮益恭不言而信有感則通多壘以之而罷
警四門以之而除兇反涓和于國儉致符瑞於年豐天
亦難諶胡甯不惠枉矢流蒼震之野火耀奄前星之次
捨內豎之間安進浮止而把袂九重增慟萬邦銜涕冥
茫少海之波寂歷洊雷之肆嗚呼哀哉感神飈之遠至
嘆芳歲之云徂違大學之齒胄啟佳城而下居建采章
于綢練儼備物于塗芻經武帳之崩庵據青龍之鬱紆
嗚呼哀哉苦霧閉塗窮陰殺節重雲之旭日如晦大壑
之層水似雪指京口而不臨背都門而永訣萬目愁而
旆旌慘羣心感而笳簫咽嗚呼哀哉瞻瑤山之落木聽

玄圃之迴風臺思子以何極宮長男而遂空集荆門之
故吏會商嶺之悲翁淚淋浪而洒袂氣怨結而盈胸嗚
呼哀哉歷邃古以遐觀考令猷於三善孰仁孝之昭著
復功名之不顯惟史筆與毗頌配天長而日遠甯騁麗
于東田豈駁能于文選嗚呼哀哉

齊王贈太弟哀册文

代喬侍郎

維年月日天策上將軍太師尚書令臨川牧齊王薨于
臨川府之正寢主上追先皇付託之意表叔父遜讓之
風乃下明詔册贈太弟卽以其年十一月日葬于江州
某縣某鄉廬山之原從理命也綃幕夕陳虞歌曉引改
兔園之賓館設龍樓之陛楯闐靈儀以愈遠窮哀端而
靡盡愴永恨于宸襟俾誕揚于令聞其詞曰

皇天眷祐錫唐良輔時惟宗英裔自文祖孝弟敦慤機
神穎悟昔在中興爰當就傅申畫宛水錫茲茅土德望
日躋邦家是毗鈎陳宿衛宮籥攸司於惟淮甸實始皇
基道之以禮董之以威俗賦甘棠之頌人歌樂職之詩
運屬繼明業隆二聖首輯瑞玉來參大政乃爲左相其
班上台乃封夏口其賦千乘赫矣元后蒸哉古風不私
其子天下爲公並命叔仲奮茲顯庸或踐我舊藩或陟
爾青宮辭不獲命處之益恭晉鄭之勳推而更融臧札

之操久而彌崇若泰伯之讓異周公之東京江汝水旌
節從容皇統既正靈符允荅國步清謐羣生欣洽復大
道于三古永文昭于萬葉越我嗣君尊尊親親極以呂
望之高位崇以貞觀之舊稱賜書不詔贊禮不名曰子
小子實繁叔父維藩維翰宗社之故永錫難老日新王
度謂天蓋高命亦靡常台階殞宿河月沉光慟東堂之
哀臨輟南國之春相與聖賢而其歎獨天地之何長嗚
呼哀哉知生若寄臨凶奢於蜃炭舉土庶而均哀頌聲
猷于無間嗚呼哀哉歸虎節於王府靡鸞旌于雉門閑
西園之風月慘緱嶺之烟雲象輅迴兮遵途遠歸帷整
兮逝水奔賓友散兮霰雪積巾箱故兮經籍殘嗚呼哀
哉身歿壤存道悠運促贈今日之典冊閱當時之寶玉
全大義以經國激清風而被俗昭遺烈于千齡寄玄堂
於陵谷嗚呼哀哉

徐集卷十四

十一

徐騎省集卷第十五 墓銘一

東海徐 鉉

唐故左諫議大夫翰林學士江君墓誌銘

唐故泰州刺史賈公墓誌銘

唐故泰州刺史陶公墓誌銘

唐河南方公墓誌銘

唐故筠州刺史周君墓誌銘

唐故朝議大夫太原王君墓誌銘

唐故奉化軍節度判官趙君墓誌銘

唐故左諫議大夫翰林學士江君墓誌銘

徐集卷十五

一

公諱文蔚字君章其先濟陽考城人也昔高陽恢若水之靈光有萬國伯益獲箕山之護克成夏功故其子孫延祚丕顯茅土錫胤圭組流光在漢者為孝子在宋者為忠宰在梁者為烈將在陳者為詞臣長城既封淮水亦絕辭周粟而遠驚避嬴亂而深藏徙籍建安世為大姓至於我王考毗考秦皆以隱德清操垂為門風惟公嗣奕葉之賢負生知之異幼挺奇表夙韜殊量殫儒墨之祕奧窮文史之菁英閭里歸仁宗黨稱孝于時天下未一遐方不甯公鄙斥鷃之為從黃鵠之舉類延州之觀樂同太史之探書升名俊造從事河洛衰俗難佐天

壤不支我烈祖孝高皇帝王業始於江東仁風被于四裔公杖策高蹈款闕來儀府朝肅以生風臺閣藹其增氣署州觀察巡官試祕書郎遷水部員外郎賜緋魚袋王國初建改比部員外郎知制誥于時天人協應獄訟攸歸舜禹相與言游夏不能措潤色之任也我則無慙既受禪遷主客郎中知制誥如故俄而眞拜仍賜金紫今上嗣位大禮聿脩徙公爲給事判太常卿事時同軌胥會會有司失職公與司門郎中蕭君儼博士韓君熙載協力建議周行翕然由是祖功宗德之位定大行昭名之義允功著高廟與天無窮明年拜御史中丞矯枉

徐集卷十五

二

持平無所顧憚坐廷劾宰相其言深切貶江州司士叅軍初國朝自王義之後曠數百年憲署之閒舉無廢職然未有危言激論如此之彰灼者也故權右振竦朝野喧騰傳寫彈文爲之紙貴人心旣爾天鑑亦迴前所劾者或免或黜公就加江州營田副使頃之徵爲衛尉卿俄拜右諫議大夫充翰林學士權知貢舉出納密命樞機靡失登進造士衡鑑無私聳禁署之清風著春官之故事薦賢之賞行及于台司曳杖之期奄先于朝露春秋五十有二保大十年八月二日卒于京師官舍皇上痛惜爲之廢朝送死卹孤一從公賜有司考行易名曰

簡卽以其年九月十三日葬于某縣某里之原禮也長子熹祕書省正字次子騫皆早卒今以從子翹爲嗣嗚呼哀哉公心平氣和貌古神正雅好玄理有方外之期尤善詞賦得國風之體去華簡禮不以位望驕人憐才誘善不以威名傲物操履堅正靡得動搖襟懷坦夷初無蒂介謫居江楚恬然自足孜孜色養蒸蒸孝心嘗爲詩云屈平若遇高堂在應不懷沙獨葬魚此其心也江州節度使賈公崇以武立功以剛肅物事公如師傅親公如兄弟時皆服公之重名而賢賈之樂善也旣歸京寓居公廨無以家爲二子繼亾一慟而已齋死生于夢

徐集卷十五

三

覺遺寵辱於錙銖古之達者何以過此嗚呼凡我僚舊均哀共戚入黔婁之門闔覽伯喈之經籍睇落日以流慟愬秋風而沾臆企景行於高山勒哀詞于樂石其詞曰

高陽之裔伯益之孫展矣君子載大其門爰翔爰集樂我樹檀影纓幕府振藻西垣禮儀卒獲風憲攸端道行在時業隆自我英英若人見義必果直指烈烈宮鄰瑣瑣死生以之何適不可允矣天鑒明哉主恩乃還宣室乃入修門從容禁署密勿王言得才爲盛知人則難求

尸宗伯載善其官人必有終古無不死嗟嗟若人風流

永矣徐庶有母鄧攸無子闕里諸生荊州故吏謂之何哉啜其泣矣秋風落木逝水成川昨朝飛蓋今日荒阡一邱殘照萬古愁煙素車自返寶劍高懸高才兮直道共盡兮何言

大唐故中散大夫檢校司徒使持節泰州諸軍

事兼泰州刺史御史大夫洛陽縣開國子賈

宣公墓誌銘

公諱潭字孟澤洛陽人也周先同姓卽列國之諸侯漢得名臣乃洛陽之才子攀鱗河北豈須方面之功借筋譙都自有良平之策源長派遠德厚流光史不絕書後

徐集卷十五

四

將必大當先天之內禪也我七代祖黃門侍郎平陽公曾實演不命及至德之中興也我六代祖黃門侍郎晉國公至實贊大猷曠古已還一家而已五代祖孫衡州刺史高祖種司門員外曾祖昶太子司議郎祖琛河南密令皆有韜世之量濟眾之仁大位不躋餘慶斯洽考翊以經術擢太常第以才用爲諸侯卿捍寇輸粟有勞王室于是佩金紫升朝廷上疏論邠甯節度王行瑜恃功恣橫坐貶愛州掾及行瑜就戮優詔徵還復出常州刺史鹽鐵江淮留後屬宗社中絕官司解弛計吏未上哲人其萎公有世德之資負夙成之器風神爽邁智術

通明景福二年以學究一經射策高第釋褐京兆府參軍事遷祕書郎侍從南遷進修不懈天祐丁卯歲居先君憂服喪過哀宗黨稱孝楚泗郡守宣城廉使虛左交辟三府馳名俄丁內艱感憂如禮藝祖武帝創基分陝側席求才素與公周旋卽加禮命奏記書檄一以委之內贊謨猷外爲詞令出應盟會入陪罇俎霸功光赫公有力焉十有餘年任用無閒旣而楚雲告變穆醴不陳已酬國士之知亦得退人之禮改宣池觀察判官烈祖高皇帝受命中興不忘舊德徵拜祕書少監充儀禮副使遷中書舍人崇英翰林學士周慎密命潤色王言公

徐集卷十五

五

望無渝朝獎彌厚保大嗣統拜兵部侍郎知制誥學士如故充永陵儀禮副使同軌胥會大禮無違遷兵部尙書修國史考定郊廟之樂褒貶歸正擊拊允諧會六夷南侵天眷北顧命公持節使于契丹宣大國之威神得諸戎之要領及軺軒還軫而控弦出塞矣報命稱旨時論具瞻于是避寵台衡就安關輔除泰州刺史視事數月不變土風邁疾還京保大六年九月二十有一日卒於江甯永安里官舍享年六十有八皇上軫悼再不視朝飾終之禮務從加等太常考行賜諡曰宣以某年月日葬于某所與夫人楊氏合祔焉禮也長子朝散大夫

行大理司直彬次子泰州司倉叅軍穆少子修等咸負當世之才皆爲保家之主種德垂範未易可量長女用文適水部員外郎楊元鼎不幸早世次曰用柔適膳部員外郎知制誥張緯次曰用光適進士姜某少曰季芳尙幼惟公事業富壽昭映一時族望婚姻熏灼當代自非天監與善孰能若斯雖大用未光而能事畢矣鉉以世親之舊執隨行之敬服義承教惟公在焉刊勒論撰蓋感遇之萬一也其銘曰

於惟茂族實有世德七葉繼軌嘉猷允塞亶矣君子其儀不忒修詞立誠以匡王國言以文身兵由威克東畿之政爲邦之則天地長在春秋代遷今朝喪善何日生賢蒿里誰地佳城許年永安舊里門館依然寢丘傳邑京兆開阡勒銘泉石以配青編

唐故泰州刺史陶公墓誌銘

徐集卷十五

六

公諱敬宣字文褒其先尋陽人因官徙籍今爲合肥人也西京作相開國封侯于是貽孫南國主盟長沙公茲焉不朽籬邊黃菊解縣印以言歸嶺上白雲挂朝衣而莫返光靈攸屬固無得稱之丹青所存可畧而言也高祖復右監門衛將軍曾祖琳建州錄事參軍祖晟青州博昌縣令皆天縱其能世濟其美韎韐君子屈迹于驥

游縉紳先生折腰於州縣積善餘慶明德後興考雅武
昌軍節度使贈太師楚惠公雲雷今上屯龍虎冥會橫瑠
戈而蕩寇功冠一時裂鶉尾以疏封禮優萬戶公卽太
師第四子也幼而岐嶷長而俊茂非禮勿動時然後言
天祐中門廕起家太子校書遷至府長史賜緋魚袋丁
先公憂時年十四孝心昭感喪禮無違釋服除都官郎
中賜紫金魚袋改大理少卿青縑寓直時推伏閣之勤
丹筆持平人絕署門之歎俄遷江都少尹趙張治劇由
來表則之司淮海分疆自昔輕揚之地公處之貞固行
以廉平愛民則忠事長以順一圻欣賴三載有成遷大

徐集卷十五

七

理卿仍兼尹事烈祖孝高皇帝允釐百揆實總六師爰
求鄭國之良以貳楚人之廣奏請君判左右軍事丁酉
歲堯咨文禪禹迹中興徽舊德于角犀考官成于喉舌
拜工部尚書今上嗣位加金紫光祿大夫檢校太保會
閩人作梗王旅欲南聲實所資豫章爲急故輟公副總
判軍府及羽檄四出芻輓相尋民以悅而忘勞事有備
而無患嶺表既定洪人亦康復移宛陵仍兼棣州刺史
海陵郡甸服之地邦賦最優歲比不登民用胥怨除泰
州刺史公以清淨爲理仁恕積中視吏民其如傷守法
令而畫一餘糧棲畝無庚癸之呼白駒過隙感辰巳之

歲春秋五十有二保大八年夏四月十有八日卒于位
上省奏傷悼輟朝兩日有司考行賜諡曰順卽以其年
月日權窆于東都明年月日葬于江都府縣里與前夫
人合祔焉禮也惟公冲和體質仁孝爲基立身有常與
物無忤尤善聲韻聞音而知樂頗好篇詠下筆而成章
身後不留餘財所任必有遺愛求之作者斯亦難能嗣
子泰州司倉參軍崇鼎崇諒崇倫等皆勤修令名夙奉
成訓君恩靡替家法如初鉉昔在朝行實惟舊好今從
左宦仰繫東道痛死生之已矣感意氣以何報延陵挂
劍願保于不欺峴首刊碑終慙於妙絕銘曰

徐集卷十五

八

淮淝之靈衡霍之精必有賢傑爲時而生乃伯乃仲乃
侯乃卿望冠六事風馳百城人生有涯大命夙傾不見
君子猶存政聲遠日旣吉靈輻旣行寂寞公館蕭條古
垆哀哀郡人泣涕沾纓嗚呼彼蒼不知福善之胡明

唐故金紫光祿大夫檢校司徒行少府監河南

方公墓誌銘

公諱訥字希仁其先河南人也後世從官徙籍新安支
派繁衍遂爲郡之著姓迨公數世皆以儒雅退讓播爲
門風曾祖顥登州文登縣令祖亮左武衛兵曹參軍考
穀榮王府司馬母聶氏追封河南縣太君問政先生師

道之長女也公承積善之慶負夙成之智砥節礪行好學能文時然後言非禮勿動鄉曲之黨翕然稱之太師陶公來守新安撫納人士署爲郡吏委以典籤恪恭詳敏甚稱所職歷事累政其志如初烈祖肇基王業元宗實綜軍政管記之任勤擇其人聞公之名召致幕府王國初建署甯國軍節度館驛巡官掌都統表奏皇室再造慶賞遂行擢拜虞部員外郎掌元帥表奏數歲以皇孫就傅命公侍讀講道贊德勵裨益之誠端己直躬盡表微之節俄遷水部郎中明年皇孫封南昌王東都留守以公爲留守判官遷主客郎中參贊政務事無違者

徐集卷十五

九

改司農少卿依前充職明年王移任宣潤二州大都督復以公爲浙西營田副使通判軍府六載匪懈庶職交修懋官之賞詔命疊委累遷至金紫光祿大夫檢校司徒封河南縣男俄拜泰州刺史充本州屯田監院使正身而令悉心爲理公無遺利民自從風屬強敵深侵東京失守而州兵盡出人心大搖于是士庶老幼盡室南渡公自歸闕下坐是除名數年除歙州團練判官上曰戰爭之際吾豈以武勇責書生哉軍法不得不爾卽召拜太子右諭德今上嗣位遷少府監丙寅歲正月十六日卒於京師美仁坊官舍享年七十七上爲之廢朝一

日賜諡曰定以其年某月日葬于某所禮也前夫人謝氏早亾繼室施氏封沛縣君長子前宣州甯國縣主簿次子志饒州文學公以名教爲樂以矩矱自任行必中立居無惰容縉紳之間推爲純行公之外祖得道之士故公頗以朝禮修養爲務鷄鳴而起孜孜不倦年俯悼耄體常康強及屬纊之晨無伏枕之疾斯亦力行之報也鉉也不佞早辱交契昔先君從事黻歛公適出本部及公策名郎署鉉亦忝官聯既熟其素履願垂于不朽附于史氏以永令猷其銘曰

聖人四教文行忠信惟公似之光有令問秉筆贊畫登

徐集卷十五

十

朝典郡寵至若驚道喪無悶年俯中壽官參列卿歸全委順終吉永貞宰樹長在高臺自傾用刊圓石閱此佳城

唐故客省使壽昌殿承宣金紫光祿大夫檢校

太保使持節筠州諸軍事筠州刺史本州團

練使汝南縣開國男周君墓誌銘

君諱廷

今上御名

字正材洛陽人也岐山至德綿瓜賦者萬邦

洛宅舊都守枌榆者百世簪組相繼譜牒存焉曾祖侃太常博士祖潛深州樂壽縣令避亂南徙因家廣陵考延禧明經擢第有吳之霸受辟爲淮南巡官至戶部郎

中與殷文公游貞公同掌文翰無祿早世故大位不躋君卽戶部第四子也幼而岐嶷長而篤厚躬行孝悌餘力學文以蔭釋褐補弘文館校書試吏爲池州司戶參軍改宣州甯國縣尉烈祖在藩乃瞻舊族聞君修謹復有吏能因表爲黃州長史寵以朱紱置之府朝及受禪遷通事舍人鴻業肇興王澤遐布贊導之任實寄司聰護戎修聘觀風按獄受命而出動罔不臧厯事兩朝任遇彌厚賞賜旣數階勳屢遷而通事之任如故蓋惜其能也保大七年轉將作少監判四方館事浩穰之地尹正爲難復以本官判江甯府事其閒監諸侯之典者十

徐集卷十五

七

通四方之命者三攝州府之政者六按枉撓之獄者四或敷惠於新附之俗或投身於危亂之地本于忠而後動忘其生而後存元宗嘉之以爲客省使今上嗣位深惟舊勞特加金紫光祿大夫台州刺史常御壽昌殿視事中外之人咸得引見又以君爲壽昌殿承宣出爲忠義軍監軍泉南等州宣諭使還遷筠州刺史本州團練仍使充客省使君以備嘗艱危復逼遲暮懇辭繁劇恩旨不從丙寅歲十月二十二日終於京師某里之官舍春秋六十有六詔廢朝一日賜諡曰某明年正月葬于某所禮也夫人天水縣君姜氏輔佐之勤率由婦禮訓

誨諸子備有義方子大理評事崇儉太常寺奉禮郎崇
素及崇順崇信等皆儒謹能不墜其先鉉家世通舊嘗
接姻婭淡成之分終始不渝何以寘懷是用刊德其銘
曰

猗嗟周君世濟其名展如之人克嗣厥聲受任幹蠱臨
難忘身居中處約全和保真與物皆化萬古同塵松楸
勿伐蘭菊惟新刊石表墓于嗟善人

唐故朝議大夫行尙書禮部郎中柱國賜紫金

魚袋太原王君墓誌銘

君諱某字某其先太原人也昔者諸侯共職起末運于

徐集卷十五

七

髡王儲后上賓示靈期于瞽史緱山維岳肇翦賁之崇
基汾水遂荒導沈渾之遠派其後金行云季貴種言還
行者制禮樂于土中處者保邛園于淮左世濟之德鄉
人所宗故今爲廬江人也曾祖廬江令祖洪州長史皆
有廉讓之風純粹之行得祿于仕不累于高考吳尙書
左司郎中贈太府卿負適用之才獲愛人之譽應星辰
而列位道邁朝倫視河海以命官禮優贈典君則府卿
之第三子也門風漸教天質孕和翼翼服勤眞保家之
主愔愔若訥多長者之言墨妙筆精固稟于性奕思琴
德咸是所長幼有令聞獲鍾慈愛及加冠之歲以門子

叙資漢室孝廉方從令史晉時英俊更屈下僚晨昏之
養有歸州縣之勞靡憚乾貞二年自黃州司馬遷洪州
都督府別駕治中懋績屏星煥其增華公府見知佩刀
由其受賜俄拜尙書度支員外再遷虞部郎中皆判吏
部兵部事夫當官匪懈伏閣之勤也照姦得情坐曹之
能也前史所趨君皆則焉頃之以親累解官君雅好玄
言夙尙閑適由是角巾私第閉關卻掃交游罕得見其
面窮達不以介其懷用晦而明居貞以利高皇帝受禪
之始牽復疏恩拜工部郎中轉禮部郎中寓直中書省
預聞機密彤庭弘敞禁垣清切絲綸之出堯言于是惟

徐集卷十五

七

行樞機之微省樹由其勿洩方將振鱗溟渤驪首雲霓
而生也有涯仁而不壽昇元六年夏六月二十有二日
卒于建康翔鸞里之官舍享年五十有一嗚呼哀哉惟
君孝於事親悌于承長和以接上廉以在公胥史臣僕
靡不被仁恕之惠家人妻子未嘗見喜愠之容學古觀
書如恐弗及卹舊敬老周知其疲三德聿修五福斯闕
卽世之日遺愛存焉卜遠不從旅殯京邑後四歲春二
月五日嗣子延紹延貞等始備大葬之禮窆于江都縣
某鄉里從先卿府君大瑩與夫人李氏合祔焉禮也鉉
以世親之舊承子妻之知怨明德之不常痛祖行之斯

在退食自公薄送于畿刊樂石以爰紀庶令名之不虧
嗚呼哀哉其銘曰

汾川溶溶淮源颯颯興我宗兮世濟其美家餘其慶生
我公兮靖恭正直言行名迹存南宮兮與義相扶知命
不憂永考終兮邗城之右蜀岡之陽馬鬣封兮道不虛
行有令之子遵遺風兮

唐故奉化軍節度判官通判吉州軍州事朝議

大夫檢校尚書主客郎中驍騎尉賜紫金魚

袋趙君墓誌銘

君諱宣輔字仲申其先天水人也累世從官不常厥居

徐集卷十五

十四

曾祖全真工部員外郎滕州刺史祖倚太子校書考台
歙州海甯令君卽海甯府君第三子也生於廣陵長于
江左幼而俊敏博綜羣書尤善刑法之學烈祖輔政方
申明紀律君以是中選釋褐補江都府文學直刑部明
年改信州司法參軍察獄詳刑號爲詳練久之召赴闕
以本官權參元帥府法曹事踰年改大理評事元宗嗣
服之初庶獄權要舉不附己者因中傷之君坐黜爲饒
州司士叅軍明年王師伐閩護軍查公表君才可煩使
以本官判軍司事時頓兵深入自冬涉秋經束馬懸車
之塗督飛芻輓粟之役事集師克君有力焉師還加朝

散大夫行常州義興令推誠率下民用協和丁憂去職復爲江州錄事參軍時連帥議浚湓浦以屯舟師詔從之君以無益戎備而勞民力乃指陳利害抗疏極論上甚嘉之卽命止役由是遷大理司直通判蘄州軍州事明年遷檢校水部員外郎充建州觀察推官通判軍府事會越人闕邊使間誘建民將以爲亂君廉得其實盡按誅之優詔褒美賜衣一襲遷檢校屯田員外郎三年徵拜守水部員外郎判度支時師旅薦興軍食不給命君爲沿江催運使軺傳所至轉輸如流朝議以姑熟居畿甸之間實供億之始徙君爲當塗令踰月復徵爲主

徐集卷十五

十五

客員外郎判大理寺賜紫金魚袋始君以理官得罪至是上知其無私故復任焉守官循理挺然中立轉工部員外郎仍判寺事今上嗣位上疏論時政以爲刺史縣令親民之先而考績掄材未盡其理上深然之遷朝議大夫戶部員外充宣歙常潤等道安撫使以刺舉無避爲權臣所排宸鑒昭明故得無咎使還以本官判兵部事廬陵羣盜充斥州兵不能制上憂之亟命君爲奉化軍節度判官判吉州事轉主客郎中擒姦摘伏克舉其職其年秋九月七日遇暴疾翌日終于郡之官舍享年六十有一明年春二月歸葬江甯府某所禮也夫人查

氏吉王府長史昌之女也工部尙書文徽之妹婉孌之
德閨房之秀內助著美士林所推子七人長曰鈞袁州
新喻尉次曰錯樞密院承旨次曰鍾舉進士次曰銓前
國子監三禮次曰鐮鉞鑣皆國子監生女一人適祕書
省正字周希定君有孝悌之性聞于宗族敦然諾之信
稱于友朋守己有常事君不諂位未達而知足祿雖優
而彌貧其當官持事也必盡己所長不爲利回不爲威
惕故屢失大臣意然好直之士亦以此多之鉉久塵近
職熟君操行直筆聳善以告後人故銘其墓曰

英英趙君松茂蘭薰應用以法飾身以文道直詞正心

徐集卷十五

六

平氣純如何不淑今也爲塵金陵仙鄉古多名人歸骨
于是與善爲隣泉臺不曉壟樹空春勒銘挂劍慷慨沾
巾

徐騎省集卷第十六

東海徐 鉉

唐故中書侍郎光政殿學士承旨昌黎韓公墓銘

唐故守尚書刑部侍郎喬公墓誌銘

唐故建州觀察處置等使陳公墓誌銘

唐故檢校司徒苗公墓誌銘

前虔州雩都縣令包府君墓誌銘

唐故常州團練判官檢校尚書左僕射劉君墓誌

唐故印府君墓誌

唐故御史中丞包君墓誌

徐集卷十六

一

唐故中書侍郎光政殿學士承旨昌黎韓公墓

誌銘

公諱熙載字叔言其先南陽人傳稱武王之穆詩美韓侯受命晉以六卿升降漢以三傑重輕至東晉末征西從事延之以忠義之節踐艱屯之運避亂遠徙遂家昌黎餘慶流光最爲繁衍曾祖鈞太僕卿祖殷侍御史考光嗣祕書少監淄青觀察支使故又爲齊人公秉夙成之智負不羈之才文高學深角立傑出年始弱冠遊於洛陽聲名藹然一舉擢第同光之亂藩郡崩離公以國難方興家艱仍今上瞻烏擇木杖策渡江烈祖孝高皇帝

納麓在辰側席時彥得公甚喜賓禮有加于時有吳肇
基庶事草芻公以俊邁之氣高視名流既絳灌之徒弗
容亦季孟之間不處以校書郎釋褐出爲滁和常三州
從事公亦怡然不以屑意詠風月遊山水而已中興受
命上嗣撫軍以公有七子之才膺四友之拜徵爲祕書
郎掌東宮文翰元宗深器之及踐位以爲虞部員外郎
史館修撰賜緋又以大禮繁疊加太常博士時有司議
孝高廟宜稱宗司門郎中蕭君儼上疏論之公與給事
中江君文蔚協同其議凡書疏論難皆成于公手由是
廟號尊諡定于一言君子以爲眞博士也頃之以本官

徐集卷十六

二

權知制誥初公但以文章際會未嘗與政及其當維新
之運感知己之恩未及聽政章疏相屬或駁正失禮或
指摘時病由是大爲權要所嫉竟罷其職丞相宋公朝
之元老勢逼地高公又廷奏黨與詞旨深切天子優容
之而用事者滋怒旋貶和州司士參軍數年移宣州節
度推官徵還復爲虞部員外郎遷郎中史館修撰賜紫
俄拜中書舍人從時望也公雖才識優贍而質性疎散
凡在位者道復不同於是深居移病罕與朝謁時兵興
之後國用不充公援古酌今請以錢爲幣時獻封者甚
眾元宗獨以公議爲長卽拜戶部侍郎充鑄錢使今上

踐位改吏部侍郎兼修國史初鑄錢之作也自宰執而下相與沮之故百司不供久未就上爲之曉譬事理親加督責而公猶不勝其忿嘗因對見聲色俱厲因徙爲祕書監不逾年復拜吏部侍郎新錢旣行大濟經費詔賜錢二百萬拜兵部尙書充勤政殿學士承旨公少而放曠不拘小節及年位俱高彌自縱逸擁妓女奏清商士無賢愚皆得接待職務旣簡稱疾不朝家人之節頗成寬易雖名重于世人亦訝其太過上不得已左遷太子右庶子分司南都于是謝遣伎樂單車首路留之未幾復爲兵部尙書學士如故是時歲比旱歉主上憂勤

徐集卷十六

三

公復論刑政之源明防救之術又上格言五篇手詔嘉納卽拜中書侍郎充光政殿學士承旨初上選近侍數臣直宿禁中常御光政殿召對夜分乃罷故命公此職以寵異之霖雨之望方深鐘漏之期遽逼春秋六十有九庚午歲秋七月二十七日沒於京鳳臺里之官舍上省奏震悼爲之涕流有司奏當輟朝三日手批天不憇遺碎我瑚璉辭章乍覽痛切孤心嗟乎抗直之言而今而後迨不得其過半聞聽者乎可別輟朝一日贈右僕射平章事仍官給葬事士庶聞之知與不知莫不爲之悲歎有司考行易名曰文靖卽以其年九月某日葬于

某所禮也夫人隴西郡君李氏生簪纓之族有桃李之芳內則有光夜川先逝繼室北海縣君蔣氏長子疇爲奉禮郎早卒次子伉爲校書郎聰慧夙成無忝世德次曰佩曰份曰儼曰佺曰儔曰俛女四人或作公族或爲尼出家嗚呼哀哉公之爲人也美秀而文中立不倚率性而動不虞悔吝聞善若驚不屑毀譽提獎後進爲之聲名片言可稱躬自諷誦再典歲舉取實去華故其門人多至清列屢從譴逐殆乎委頓俯視權倖終不降心見理尤速言事無避凡章疏焚藁之外尙盈編軸焉審音妙舞能書善畫風流儒雅遠近式瞻向使檢以法度加以慎重則古之賢相無以過也俸祿旣厚賞賜常優忘懷取適不事生計身歿之日四壁蕭然衣衾櫛櫛皆從恩賜詔集賢院編其遺文藏之祕閣凡所開卷可知也鉉與公鄉里遼夙年輩相懸一言道合傾蓋如舊綢繆臺閣契闊江湖區區之心困而獲雪一生一死何痛如之援毫反袂識彼陵谷其銘曰

猗嗟韓公有蔚其文俊才絕俗逸氣凌雲高名直道玉振蘭薰猗嗟韓公天賦忠規君臣之際言行俱危其身可辱其節寧虧猗嗟韓公屈亦能伸松寒益茂玉焚始眞乃感明王乃爲大臣送往事居不緇不磷嗚呼韓公

胡爲而然閱此相印歸于夜泉茂陵遺簡京兆新阡斯
文不朽此別終天哀哉郢匠已矣牙絃勒銘圓石永識
桑田

唐故朝請大夫守尙書刑部侍郎柱國賜紫金

魚袋喬公墓誌銘

并序

士有放懷夷曠介然中立外物無累於心沒齒不違于
道吾友喬公嘗從事於斯矣公諱匡舜字亞元廣陵高
郵人也曾祖譚祖泰皆不仕考鴻漸本縣尉家世清操
州閭稱之故其子孫必有興者公少好學善屬文弱冠
游京都詞藻典麗容止都雅烈祖輔政見而器之補祕

徐集卷十六

五

書省正字丞相宋楚公初獲進用位望日崇聞公之名
辟置門下每爲文賦詩詠輒加稱賞由是名譽日洽而
卿士大夫皆前席待之累遷大理評事司直監察御史
屯田員外郎從宋公出藩爲江西浙西掌書記府公告
老歸九華山公乃升朝爲駕部員外郎未幾守本官知
制誥就遷祠部郎中中書舍人典掌樞機周慎靜默凡
十餘年值邊境倣擾師出無功詔旨親征中外憂懼公
上疏極諫坐阻撓軍勢黜居臨川頃之宋公獲譴又以
故吏爲累由是累年沉廢今上卽位徵爲水部員外郎
改司農少卿判太常寺轉殿中監修國史拜給事中權

知貢舉又兼獻納使遷刑部侍郎公自徵還數年間聯
厯清望蓋舊齒直道上簡聖心至是以老病不堪朝謁
聞上知其家貧詔以貳卿之秩養疾壬申歲九月二十
有三日卒於京師濱江里官舍享年七十有五遺命以
周易孝經寘棺中太常考行易名曰貞卽以其年冬十
月二十有三日葬于江甯縣某所禮也夫人太原縣君
郭氏代公玄孫晉陵令喻之女也餘慶所備門風甚高
婦德母儀聞于宗族一子僧孺祕書省正字早卒孫諶
亦爲正字公之爲人寬簡真率常以詩酒自適不以勢
利縈心毀譽讒慝之詞聞之晏如也從事楚公府殆二

徐集卷十六

六

十年凡爲府公見知者皆詭譎傾側公獨淡然無營守
正不諂故但以文藝知賞未嘗任用烈祖下詔公卿舉
可以親民者楚公所薦非其人烈祖甚不悅謂給事中
常公夢錫曰吾望其薦匡舜也常公及中書侍郎韓公
熙載嫉楚公如讎而與公善嘗相謂曰宋公誤識亞元
正可怪也公之厯任奉法循理似不能言者及其臨危
擊節抗詞忤旨侃侃然有古人之風黜官奪祿甘貧守
約凡五年不形于言色恂恂然道家之流也故能享老
壽保康寧歸全委順斯可貴矣公臨終數日舍弟往候
之怡然言曰吾往矣君兄弟可各爲一詩哭我盃日復

告門生曰吾已得徐君兄弟許我詩餘無事矣其忘懷
死死也如此嗚呼絮酒之禮已隔平生挂劍之信永昇
穹壤故以二章爲誌闕於九原所撰集七十餘卷編紀
之任屬于門人此不備書也其詩云

舉世重文雅夫君更質真曾嗟混雞鶴終自異淄磷詞
賦離騷客封章諫諍臣襟懷道家侶標格古時人逸老
誠云福遺形未免貧求文空得草埋玉遂爲塵靜想忘
年契冥思接武晨連宵洽杯酒分日掌絲綸蠹簡書陳
事遺孤託世親前賢同此嘆非我獨沾巾

錯詩云

徐集卷十六

七

諸公長者鄭當時事事無心性坦夷但是登臨皆有作
未嘗相見不伸眉生前適意無過酒身後遺言只要詩
三日笑談成理命一篇投弔尙應知

唐故左右靜江軍都軍使忠義軍節度建州觀
察處置等使留後光祿大夫檢校太尉右威
衛大將軍臨穎縣開國子食邑五百戶陳公

墓誌銘

公諱德成字仲德其先潁川人也帝媯餘烈侯滿崇封
盛德之祀綿邈于百世光遠之慶蕃衍于萬國故我洪
胄代雄建安王室中微閩方角立網羅英異弘濟艱難

我曾祖茂新祖滔皆以雄才勇略奮揚忠力將領之任
生表其策勳督護之名沒垂于節壤父誨檢校太尉兼
侍中建州刺史忠義軍節度使諡忠烈殊勳大節有信
史豐碑存焉公卽忠烈公之長子也鍾粹和之氣秉沖
淡之心通習孫吳固其家法酷好墳典乃自天資就傳
之年已著名譽先公剖符劍浦威信洽聞諍子之助實
有其力弱冠爲本郡裨將先公以身守邊郡心存本朝
累表遣公入宿衛卽擢拜右千牛衛將軍充殿直指揮
使恭命畏法修身擇交先公每言邊事常密疏于紙遣
公上啟默識強記敷奏閑習元宗甚嘉之累遷右靜江

徐集卷十六

八

指揮使值淮上兵起王師不振公屢上書自奮詔隸西
北面行營以舟師趣濟難破其屯戍遂入海陵與諸軍
會勵兵固守強敵日益公連戰破之虜獲千計圍兵旣
遁乃涉長淮指下蔡別率戰艦分擊浮橋三中流矢神
色自若自秋徂冬且戰且前凡五進軍壘皆以眾寡不
敵之勢當輕悍卒至之師臨難忘身每戰必捷而元戎
逗撓逆臣攜叛羣帥失道公全軍而還遷右宣威軍廂
虞候制曰獨此一軍之眾堪爲百戰之師其見稱如此
數月爲和州刺史又爲左天威將軍廂虞候明年改池
州刺史是時疆場甫定閭井未完公奉法循理正身率

下庭無滯訟吏不生姦鐵軸牙檣無忘水犀之備輕裘
緩帶常爲峴首之游賦詩紀頌粲然可述元宗南狩從
至石牌上每登臨置酒必命公陪侍訪山川之形勢問
風俗之美惡應對詳敏咸有條貫捧觴上壽進退由儀
求解印扈蹕優旨不許今上嗣服屢表乞還徵爲右天
德軍都虞候舊制常以舟師爲下軍至是詔旨以南國
之用尙于舟楫今而後知非是乃簡練精銳置龍翔軍
以隸親衛命公爲龍翔都虞候舟師之重自茲始也會
先君來朝臥疾邸第公親侍醫藥躬執煩辱容貌瘠損
衣不解帶客至問疾者不知其已貴也及丁憂制哀毀

徐集卷十六

九

過禮扶護靈柩歸于建安詔起爲歙州刺史本州團練
使視事三載其理如初秩滿復爲右龍翔諸軍都虞候
遷都指揮使每仲秋講武訓兵仲冬而畢進退號令由
公指顧威容嚴整覩者肅然頃之又爲虔州巡檢使知
州事五嶺之際地廣民悍內據谿洞外接蠻夷告訐斂
數習以爲俗于是申以刑政示以嚴明廣視聽審情僞
吏以微文出入者皆面詰其狀莫不惕息退弊爲之革
人之以和於是浚溝隍嚴壁壘出私帑以助費因農隙
而僛功凡書勞考績此其昭昭者也尋拜池州觀察使
以其秩居虔州上以建安之地人思舊德且欲以晝錦

之盛顯公之能乃除忠義軍節度使建州觀察處置等
使留後公以違奉歲久無以私爲抗表來朝固辭不拜
改右威衛大將軍充左右靜江都軍使又轉光祿大夫
檢校太尉奉以建州之祿歲計千萬甲第廐馬賜與優
渥俄而被疾自識終期申告理命備有規度中使問疾
但曰世受主恩未有以報唯此爲恨耳又親問門吏草
遺奏旣成自益兩句曰苟游岱之有知必結草以爲報
上省表震悼手詔荅之公猶捧詔向闕稽首流涕壬申
歲秋七月十有二日卒於建業濱江里之官舍春秋四
十上痛惜之至再不視朝贈安南大都護遣中使監護

徐集卷十六

十

葬事皆從官給有司考行易名曰烈卽以其年九月日
葬于某所從理命也夫人信都郡君刁氏故昭武軍節
度使能之女容德之美閨房之秀宜家睦族光此門風
子倩孝友聰慧修詞好學以蔭起家授著作佐郎必大
之慶其在于是嗚呼哀哉公生於戎馬之際長承鐘鼎
之業修文習武全孝資忠風格端莊襟懷夷直嫉惡獎
善如恐不及穆親念舊無有所遺先人之費公私畢給
出入數載家爲之貧在公之餘手不釋卷篇詠詞筆皆
傳於時近代儒學將唯公而已凡四典藩郡皆有借留
去思之美民到于今稱之由是恩顧特隆委遇無間修

塗方騁大年不登知與不知皆爲悲歎鉉與公非故特以道義相期雖復出處不齊班序致隔金蘭之分終始不渝寢門流慟痛生死之永已圓石表墓患陵谷之靡常亦公之遺言以此見託豈非慷慨之氣思振發于知己哉故爲銘曰

龍泉之靈武夷之英生我儒將垂茲令名臨戎有勇察俗有聲爲臣之節與世作程位逼建牙秩參掌武才實膺時忠惟得主鬱此雄圖溘然中露謂天蓋高不可以愬悲哉俊氣永已荒丘鳳臺遺館梅嶺窮秋樹惟挂劍地卽眠牛餘芳不泯淮水長流

徐集卷十六

七

唐故檢校司徒行右千牛衛將軍苗公墓誌銘

公諱延祿字世功其先上黨人昔者楚多淫刑賁始逃難晉賴謀主苗受其封高門之慶雄視欒郤綿綿瓜瓞翼翼孫謀存諸簡編可以揚摧延洪於我七代祖中書舍人延嗣光大於我六代祖太師晉卿源流繁衍蔚爲甲族中朝喪亂後裔播遷匿迹淮楚之間今爲盱眙人也先公諱隣生於兵戈之間長習旗鼓之用遭遇英主建功立事出爲泗州防禦使入爲靜江軍統軍世卿之祀衰而復振公卽靜江之長子也弱不好弄壯而有立負雄勇之量不以驕人秉剛直之資未嘗忤物持重善

戰默識寡言時輩推之以爲君子初先公奉王略領偏師南破山越西定江楚東絕滄海北捍徐戎弓不解卷兵不匣刃公年甫弱冠實參其間舉旗斬將所向披靡宣力用於君父舒壯氣於風雲然而職以序遷蓋歸美於先公也烈祖孝高皇帝中興大業疇咨舊人命公領泗上精兵入爲宣威軍裨將六卿之選以翼京師八屯之權實資宿衛歷紀授任一心靡渝今上祇嗣鴻圖益宣朝寄總千牛之士以爲心膂假五教之秩以崇班列會侍中燕王以帝子之重兼鎮兩藩詳求命卿以事大國俾公提步卒屯宣城凡甲兵壁壘之事皆聽於公夙

徐集卷十六

三

夜惟勤燥濕生疾春秋六十一保大九年十月七日卒于宣州公署上省奏傷悼爲之罷朝送終之禮有以加等卽以其年十二月二十七日葬于江甯府縣里禮也夫人王氏淮南裨將唐之長女也先公負游俠之氣有征討之功勇冠三軍力制奔虎夫人麗桃李之質襲蘭蕙之芳婦禮聿修遺訓無墜君子以孝慈率教夫人以嚴正克家閨門之理實有內助以保大八年五月一日先公而逝今始祔焉子全厚全瞻全節全義全海皆有父風苗氏爲不朽也鉉本自世親早爲姻族歎侯封於李廣發哀詞于杜篤刻翠琰于荒阡擬高陵于深谷其

銘曰

才之俊兮將之雄位之侯兮壽未中天難諶兮人云亡
川旣逝兮歲將窮素車兮丹旒白草兮青松悲雄心與
壯氣漸荆棘兮蒙龍

前虔州雩都縣令包府君墓銘

銘序
銘

昔者鄭都涕產知懷仁之有誠孔門慟淵見福善之無
驗遺恨千古可勝言乎君諱詠字義修其先延陵人漢
大鴻臚咸之後也曾祖章祖岌皆眷戀本土卒于縣寮
考洎遇故侍中寶之亂乃去仕唐吉州長史入吳終和
州歷陽令政有遺愛故家焉今爲歷陽人也君幼而岐

徐集卷十六

三

嶷長而學問孝敬自律名利弗嬰安貧怡然綽有餘裕
順義末丁先府君憂泣血絕漿杖而後起朝廷獎勸善
政砥礪消風卽起君爲歷陽主簿秩未滿移知含山縣
令先是兵興之後循吏用稀君簡法紆刑約廉敦信縣
無逋事吏不能欺蒞官七考清嘯而已選授知虔州雩
都令西楚之地南際殊隣本之以蠻蜒之風因之以斂
斂之眾長鯨之戮雖久碩鼠之刺猶繁君下車考政經
察人病矯異俗均地征常爲諸邑之最吏民上書借替
期求真命者無虛歲矣而懋賞弗臻成功輒去解印之
日單車卽塗君素多疾至是增劇以己亥歲秋九月十

九日終於歷陽馴翟里之私第享年四十有一以其年冬十一月六日葬於本縣本鄉許思里耐先君長史之塋禮也君前娶潁川陳氏後娶樂安花氏皆良家之子淑德不爽二子曰德容德鈞二女皆佩觿卯角之歲君天資貞潔立性和雅尊敬師友敦睦親姻移之於官故所至皆理而位不參于朝籍年不登於下壽能無遺恨乎鉉兄弟少孤長于舅氏親承撫卹勉以進修門名上不傾君之力也嗚呼渭陽之贈已矣寧追逝川之嘆哀哉何極故拂貞珉紀述遺德庶深谷以徙遷見清芬之未泯其詞曰

徐集卷十六

古

懿哉華族鴻臚有聞家餘厥慶世濟其文祉祚鍾積實生我君惟君之生姿性天成清談變馬寶思凌雲道光表式才中銓衡爰職縣符政閑務舉旋綏二邑鳧飛鸞舞天亦難諶俄悲物故驚波易邈陽露難收荒郊落日宿莽窮秋銘茲幽壤永樹芳猷

唐故常州團練判官檢校尚書左僕射劉君墓

誌銘

夫資忠全孝含貞履潔君子所以沒身而守之聖人所以屈己而申之其道可傳其風可仰嗚呼劉君其殆庶乎君諱鄙字巨源其先彭城人徙居廣陵重世矣曾祖

永澧州司戶參軍祖審不仕考瓌檢校戶部尚書贈右僕射君生而岐嶷有異常童五歲而孤卽稟至性年在幼學卓然老成初先君事吳實幹近職而太夫人王氏與貞穆皇后復有姻舊故宣帝命君使事丹陽公府公龍飛以君爲殿前承旨便蕃左右靖恭夙夜動必稱職人無閒言二十年間累遷檢校禮部尚書充崇賢殿使及軍府代謝眾或將迎君侃然正色有死無二游說之詞不能入權利之勢不能動于是闔豎希旨以飛語中之坐除名流池陽郡明年有唐受禪烈祖嘉君盡忠亟召之還除常州長史悉還其官階田宅未幾又改和州

徐集卷十六

五

長史聽歸廣陵舊居初元宗方在膠庠吳帝使君召拜郎中賜以章綬自爾至於爲相每朝謁必先見君而後入及元宗卽位召至京師復命太夫人入禁中如貞穆之時謂曰吾受吳朝恩禮不敢忘也今猶數夢讓皇帝執臣子之禮吾觀當時近臣唯夫人兒爲長者帝意親之今復得在吾左右良足慰也君聞之遂稱足疾不任趨拜上仍賜第以居之歲時錫賚甚厚時使親近諭旨竟不能移上乃加太夫人封邑召君受命于朝固辭以疾上嘆息曰此子至孝今以其母故召之不來是必然也此亦古人所難吾何爲奪其節耶久之以君爲常州

團練判官不使之任優其祿而已今上嗣位加檢校右僕射君家承鐘鼎之富少居綺紈之職時逢革故年俯壯室而遂閉門卻掃高謝人間孜孜色養怡怡自得姻族以之肅穆士友以之景仰名節終始清風邈然丙寅歲夏六月某日終於建安某坊之私第春秋五十有九初君葬太夫人於茅山良常洞之西因自卜塋地卽以其年月日葬焉禮也前夫人張氏早亡今夫人吳氏實有萊妻之賢能從伯鸞之操天資玉映令問薰蘭子昭嗣女某等善慶所鍾家聲不隕愛敬哀感在禮無違嗚呼令人其必有後鉉家世通舊復連懿親常以君抗節遺世旣近代之孤標而元宗推誠聳善又列辟之難事足以激揚薄俗垂示將來乃爲銘曰

徐集卷十六

六

忠於事君孝於養親逢時有道以義衛身隱不絕俗居能保真我永終吉誰爲古人地肺之原三茅之麓左盼松岡前瞻柳谷欒棘新吹松楸再卜令問昭顯流光似續刻此蒼華永芳蘭菊

唐故印府君墓誌

君諱某字某某其先京兆人也因官徙牒遂居建康曾祖知章無祿早世祖某官考某官君幼而勤學長而力行孝悌著於家庭信義行于州里弱冠明經擢第釋褐太

子校書千里之行時輩推許會上國喪亂遂南奔豫章
連帥鍾公見而悅之辟爲從事豫章府變始歸建康井
邑更移親舊泯沒君慨然悲世難之未已感宦路之多
艱于是抗志衡門息機世表樂山水寡言語極談不過
經籍之事足迹不游卿相之門篤好六經歲誦再徧雖
憂慘疾病未嘗廢也孜孜焉修善如不及恂恂焉與人
無間言保大丙寅夏四月日考終命臨終訓勵諸子備
有嚴誠如魏顥之命無莊舄之吟春秋六十有九夫人
徐氏通儒書有婦德先君而逝卽以其年月日合葬於
某所禮也子崇禮崇粲舉進士崇簡明經及第爲舒州
司法參軍秀茂之業聞於場中咸以爲印氏之門其後
必大諸子以我宗之自出故銘譔是求銘曰
於惟穆氏代有君子恂恂若人亦旣克似退不丘壑進
不朝市體道居貞全高沒齒俊造之學施於後嗣昭昭
令名與石無已

唐故銀青光祿大夫檢校國子祭酒御史中丞

包君墓誌銘

君諱諤字直臣丹陽延陵人也粵我長源發於夏后分
封受代著於會稽司農而後代有賢哲轉徙旁郡遂家
延陵種德流光世爲大姓曾祖章丹陽令祖岷潤州錄

事參軍考泊和州歷陽令業官之美播于氓頌公以廣
明庚子歲生於丹陽長於戎馬之間遂好金鼓之政氣
質慷慨而孝于事親材用敏幹而慎于畏法命不我與
事多無成高皇帝兼總六師以輔王室署君牙門右職
將進用之君以歷陽府君喜懼之年辭歸就養因隸歷
陽軍中自是服勤祇役多在外郡家貧援寡仕不求聞
三十餘年有勞無過養心知命以保遐齡交泰元年春
二月日卒於鄱陽舟中春秋七十有九夫人危氏故賀
州刺史諱德卿之女也婦道以順家政以嚴內慎有光
六姻是則子三人曰會宗曰穎曰銳皆敬述先志勤修

徐集卷十六

六

令名號奉靈輻俯就成制卽以其年月日葬于江甯縣
某里禮也某感深自出名謝貴甥載悲涓陽之詩永痛
西州之墅敬書遺懿以鏤貞珉其銘曰

猗歟府君世載其聞有道無命與俗同羣代耕得祿全
和保真高壽八十下從先人乃整歸艗秦淮之濱乃卜
玄宅句金之陵不可不識封丘勒銘悠悠餘慶永永芳
塵

徐騎省集卷第十七

東海徐鉉

岐王墓誌銘

故平昌君孟氏墓銘

故昭容吉氏墓銘

唐故鍾氏太夫人太原縣太君王氏墓銘

唐故太原府君夫人彭城劉氏墓銘

唐故隴西李氏夫人墓銘

唐故文水縣君王氏夫人墓銘

岐王墓誌銘

徐集卷十七

一

天地之靈氣發爲賢人邦家之積慶鍾于公族其或富老成之智促殤子之年感羣情者自出於天資垂英聲者非由於事業是以蒼舒軫悼于魏祖表行曰哀夏王鍾愛于明皇錫名爲一中興在運代有人傑見于岐王矣王諱仲宣今上之第二子也文武儲慶日月輪祥實太妣之子如魯桓之貴天質秀發神機內融亦旣免懷未遑就博問安長樂視膳寢門承歡愛於瑤齋極友悌于朱邸成人之量宛由生知三歲受封爲宣城郡公假大司馬之秩維城之望日以光矣不幸今上御名疾甲子歲冬十月二日薨於閤內年四歲主上痛幼敏之異極天

慈之懷詔輟朝七日冊贈司徒追封岐王旣而感上聖之忘情遵先王之從儉節哀簡禮以厚古風卽以其月十有八日備鹵簿鼓吹葬于江甯府某縣某里之原有司諡曰懷獻禮也惟王以襁褓之年蘊金玉之度異迹昭灼可得而言至如禁中娛侍常在左右或異宮一日則思戀通宵翌旦未明必親至御幄須奉顏色然後卽安其孝也如此上每罷朝稍晏莊色未迴王則儼然侍立不妄言笑須天顏悅懌則趨就膝下怡怡稚戲不失其儀中宮以上之鍾愛恐漸于驕故撫字之方威克于愛每加教訓過於嚴厲而王凜然祇畏初不壞容退或

徐集卷十七

二

見上乃啼而自悔其敬也如此始二歲上親授以孝經雜言雖未盡識其字而每至發端止句之處皆默記不忘至于寢疾近數千言矣時聽奏樂必振袂擊節咸中律度工人試中變其曲王輒止之曰非前曲也雖周郎之顧何以加焉其慧也如此受封之日見于內殿音詞宣朗容止閑習觀之者咸歎重焉其敏也如此凡玩好之物意有欲者瞬目賞譽未嘗求索識其意持以與之必再三推卻不肯卽取受其毅也如此上曰昔人謂王勤爲神仙童子今此兒近是乎及其薨也悼念之甚曰吾見佗人賢子弟猶惜之豈惟父子之性乎中宮哀慟

至於加疾自非英姿感動孰能臻此哉議者以爲列宿
淪精高真降迹表瑞王室今復還矣嗚呼凡我臣庶暨
乎藩戚瞻飛蓋之何期慨神理之難測甯盡美于稱讚
庶騰芳於簡冊詞臣奉詔謹勒貞石其銘曰
粵我仙源流光慶延公族之異惟王生焉禮詩仁孝斯
之謂賢夙習非學生知自天旣與之智胡奪之年瞻庭
蘭刈顧掌珠捐孟冬寒氣京兆新阡鼓吹蕭蕭旌旒翩
翩踈逸躅於稚齒閱藩房于夜泉已焉哉庶彭殤之一
夢豈沒世之無傳

嗚呼庭蘭伊何方春而零掌珠伊何在玩而傾珠沉媚

徐集卷十七

三

澤蘭隕芳馨人猶沮恨我若爲情蕭蕭極野寂寂重局
與子長訣揮涕吞聲噫嘻哀哉

又銘一首

至尊所作上省庭蘭掌珠之句謂得比興之實遂廣其
意發爲斯文親迂宸翰批於紙尾足以厚君親之義行
孝慈之風是用勒石永光泉戶謹記

故平昌郡君孟氏墓誌銘

太歲癸卯五月十有九日大行皇帝諸妃平昌郡君歿
於大內之別院享年四十有三嗚呼哀哉昔天保未定
大東啟其疆魯道有蕩三桓紀其政實始孟氏代爲強

宗德厚流光之符祥發慶膺之効宜乎來裔生此淑人
曾祖某祖造父及皆以含道居貞遯世無悶克家垂訓
式永門風郡君麗窈窕之容秉肅雍之德游依漢水氣
兆河閒乃膺八月之求入預良家之選璧門受職彤管
服勤恭順之心奉坤儀而得禮明惠之智導宮教而無
遺爰屬造邦遂崇封邑路寢之後柔芳載揚旣而千載
上仙宮車晏駕號遺弓於萬國感餘香于九御沈哀共
極美疹獨縈不延幽窆之期重惻上宮之念嗚呼哀哉
卽以其年六月日葬于江甯縣安德鄉德信里之原禮
也青烏旣吉覆斧斯營永光烈女之風盡紀他山之石

徐集卷十七

四

詞臣奉詔謹勒銘曰

杳杳平野蕭蕭一丘原松積靄隴吹臨秋吁嗟淑女於
此藏舟委貞質兮長夜奉靈駕兮仙游惟惇史兮未泯
豈餘芳兮不休嗚呼哀哉

故昭容吉氏墓誌銘

天子建內官必先令德九嬪掌婦學以教六宮是故壺
則成風漢濱流化者矣昭容吉氏麗瑤姬之質富班女
之文治絲枲以服勤宮功有序徹粢盛而舉職祀禮無
愆用能妙簡皇心光膺盛典頃錫粉田之賦因開左輔
之封嗣服之初日不暇給視月卿而命秩近正朝恩閱

逝水以成川俄悲異物春秋三十有三保大三年秋七月二日薨于別宮皇帝悼之廢朝一日遣奠之禮有加等焉卽以其年月日葬于上元縣龍城鄉之原禮也昭容諱某字東海朐山人也曾祖徵朗州龍陽縣令祖黨壽陽縣令父彥輝海州懷仁縣令咸膺鄉里之選屈從州縣之勞有利物之能不享其位垂積善之慶克茂其宗著籍金門移家戚里昭映惇史不其美歟詞臣奉旨式揚懿德庶使高深自改長延丹砌之恩金石無虧仰慰壁臺之念其詞曰

吉甫作頌穆如清風儲慶炳靈實生昭容史曰明智詩

徐集卷十七

五

云肅雍內職以理柔芳有融閩川宵奔燃膏曉滅西陸移景涼風殺節虞殞流聲遣車成列茗華不磨蘭菊無絕

唐故鍾氏太夫人太原縣太君王氏墓銘

夫人太原祁人也因官徙籍遂居豫章自緱嶺肇基晉陽錫壤光靈繁祉蔚爲大宗圭組簪纓與世升降聖歷中否我亦不彰故祖考某皆蘊道居貞流謙毓德夫人有金玉之質桃李之姿柔順睦姻以奉慈訓組紉織紵聿勵家風宗族里閭莫不稱美先公司徒纘戎嗣服實臨我邦夫人誕昭四德之華用光九女之選門內之理

實皆聽之家人尙嚴婦道貴順主饋以敬均養以慈契
闊夷險始終若一邦君內則皆取正焉嗚呼昊天不庸
路寢卽順夫人棘心蓬首率由舊章素尙空玄益所明
習常齋居晏處諷誦眞文雖祁寒盛暑未嘗廢也又以
恭儉孝悌文學道義訓勵子弟皆成其名保大□年詔
封太原縣太君從子貴也二子長曰懷建由校書郎歷
東府掾以羣從百口家于豫章於是辭祿公朝歸綜司
政因除洪州都督府司馬次曰蒨以屬詞敦行從事戚
藩累登臺郎爲集賢殿學士會中令齊王避親讓寵授
鉞臨川朝廷慎選英僚以光幕府除撫州觀察判官檢

徐集卷十七

六

校屯田郎中旣拜而夫人疾亟交泰元年春二月十八
日卒於京師嘉瑞坊之官舍享年七十有五卽以其年
月日歸葬于洪州某縣某里之原禮也嗚呼富壽馘穀
天所以祐善金石銘謨世所以垂範也二者無愧可謂
賢哉鉉早奉世親晚連姻好景行懿德敢用直書其銘

曰

緱山不傾清淮不涇故我王氏實生令人衛姬之智孟
母之仁光昭祖禰垂慶來雲西山之陽章江之濱靈仙
攸宅松檟相因遐壽歸全以反吾眞

唐故太原府君夫人彭城劉氏墓銘

夫人麗窈窕之容蘊幽閒之德孝敬肇于天性明惠本於生知光乎六姻是謂賢女初我大父殷考遇皆立功興運蔚爲將臣婚姻之盛冠彼當代故夫人旣笄歸于我府君君諱承進壽州節度使國公之第三子也二族斯睦百兩是將婦禮之嚴家道爰正府君性疎直喜賓客理劇如簡不以世務嬰心行已取適不以家財爲重鐘鼎之族化爲簞瓢夫人雅性冥然自足慈和待物恭儉飾躬子孫以之而克家僕御以之而服教及罹蓬首之痛誓全柏舟之節柔芬方遠景命不融春秋四十有九戊午夏六月某日終於京師濱江坊里第子某等俯

徐集卷十七

七

就成制號奉靈輒卽以其年月日葬于某鄉祔府君之塋禮也鉉幸參諸壻獲從外姻載陳執紼之儀仍奉懷鈿之託敢書懿範以鏤貞珉其詞曰

嗟淑女兮仁慈肅雍伊君子兮亮簡疎通合二姓兮五侯之宗垂內則兮素士之風悲秋霜與冬霰摧女蘿與青松念光塵之倏忽獨天長兮無窮

唐故隴西李氏夫人墓銘

夫人諱某字某其先太原人故左司郎中贈太府卿諱潛之孫今太弟洗馬裔之第三女也伯仲世父皆踐歷臺閣抑揚聲實相糾以孝相高以讓芝蘭桃李閨庭燦

然夫人襲圭組之英發爲秀色鍾姻睦之氣凝爲淑性
柔而有則愛而不驕紉組之工翰墨之妙稟自天性能
必過人及長歸於李君君名俛故楚州刺史諱承嗣之
孫今禮部尙書度之少子也舅甥之故齊魯之匹好合
之美潘楊之風夫人移天睦族率由典禮不恃舊以廢
職不矜能而怠敬門內之理清芬穆然嗚呼嚴霜春零
薜華朝墜享年二十有五某年月日卒於京師某里之
寓居二族悲慟六姻悽愴仁而不壽古則有之以其年
某月日葬于江甯縣某鄉里之原禮也東海徐鉉以世
親之舊實維私之敬執紼永悼刊石爲銘銘曰

徐集卷十七

八

天之命兮不可知生此賢女兮鍾淑姿嬪于盛族兮昭
令儀與之才兮不與之壽永凋落兮芳時儼黼鬢道靈
輻小江村兮長江湄千秋萬代兮草離離空餘初月如
蛾眉

唐故文水縣君王氏夫人墓銘

夫人諱晬字國香其先太原人今爲廬江人也祖潛左
司郎中贈太府卿考坦禮部郎中皆以貞幹純懿見稱
于時夫人麗窈窕之容秉明慧之性幼失所恃事繼親
以孝聞在家不違于姆師移天不失于婦順初先姑之
治也嚴而有惠通而得禮夫人觀形稟教莫不率循故

三十餘年門風家法凜然如舊性尙靜退不樂世喧始
愚之在要職也夫人憂形于色及其居貶所反欣然忘
貧此其所以爲異也雖門族素盛而世塗多故祿賜所
入賙給無遺豐約同之親疎如一至於澣濯之儉組紉
之勤繁藻盡敬儒之勵操環珮中節始終不渝少善秦
聲長亦捨棄每晨興誦五千言而已享年五十戊辰歲
八月一日終于京師舜澤里之官舍其年十月二十三
日歸窆于西山洪崖鄉鸞岡里從先姑大塋禮也有子
曰夷直女曰神華林華嗚呼愚常以體道委命爲懷而
情之所鍾不知其慟銜涕秉筆庶不泯其聲塵焉銘曰

徐集卷十七

九

緱嶺之靈生此淑人洪崖之濱寄此新墳生與道俱沒
與仙隣悠悠精爽豈或爲塵嗚呼吾信積善之必爾故
攄恨於斯文

10822

